

Carta xi catsingatju San Pablo xi cafahatsja xuta nandya Filipos

**Cristu má me cjuahñu rë
xuta xi macjain rë me**

1 Ngahan Pablo cojo Timoteo ne, sacuaha mosu hndixahan rë Jesucristu ngayin. Ningatjin nuju ngu nina niji, ngayujun ni xi tsëhë Nina ngayun, hacuaha macjain nuju Jesucristu ndyá nandya Filipos. Hacuaha cojo me xi matitjun tsujun sacuaha obispos hacuaha cojo me xi visecoo rë me ne, ningatjin nina niji tsëhë me. ²Nina Nahmi naja cojo Jesucristu, me xi matitjun tsajan ne, catisua nuju me cjuandaja cjuajeya rë me.

**Oración xi sahmi Pablo tsëhë
xuta xi macjain rë me Nina**

³Hya xi tsingátahacacun ngatsë nuju ne, suá nacuechji rë Nina. ⁴Hya xi féhya rë Nina ngatsë nuju ngayujun ni ne, hatuxa tjin ná cjuasua ta, ⁵tsëhë xi ngayun ne, cuatjin visecun ná xi cumachaya rë xuta cju ndajyihi tsëhë Jesucristu. Cuatjin visecun ná hisca hya xi cafëhë tjëngë nuju ne, hisca quihndë. ⁶Cavetsihin casahmi ndajyihi Nina cjuatacun nuju. Vëhë xi ngahan ne, tjin ngucacun

xi cuatjincjin ni sahmi me hisca nixtin xi cuya Jesucristu. ⁷Hacuaha ndatjin xi cuatjin tsingátahacacun ngatsë nuju ngayujun ni ta, tsëhë xi jemu vinga ná ngayun. Vinga ná ngayun ta, tsëhë xi ngayujun ngarcun ni ne, cojo ngayun tinihñu tsë tsë xa xi casua ná Nina cojo cjuandaja rë me, quihndë xi tejñaya ndavaya nguehe, hora xi tisuá cjuaquixi naha cojo xutaxa rë, xi cju ndajyihi tsëhë Jesucristu ne, jemu ndaja camahani hacuaha hatuxa cjuaquixi. ⁸Hisca vëë jain me ta jemu meje cuinduva tjëngë nga nuju ta, tsëhë xi ngahan ne, hmú cacún nuju ngayujun ni sacuatjin hmuacacun nuju Jesucristu.

⁹Féhya rë Nina xi cuma jyë sa cjuahmutacun xi tjin nuju, hacuaha féhya rë me xi cuechutaha sa cjuatacun nuju, ¹⁰cojo sa xi cuijnercun jarë xcusun xi ndatjin xi nihñu. Sehe ngajan xi cuma tyjahi xahasen nuju, hacuaha ha café jyë nuju nixtin xi cuya nga Jesucristu ta, ¹¹tsëhë xi Jesucristu ne, ha casua nuju me cjuandaja xi cuma nihñu hacutjin xi cjuaquixi. Xi cuatjin ne, xuta ne, cjuaharcun me Nina hacuaha jemu ndaja cuichja me tsëhë me.

**Cjuasua ne, caa rë fi xcun
handasa vatju me cjuañihi**

¹²Meje ná xi cumachaya nuju tsan, ta handasa cuitjin tejñaya ndavaya ne, hacuiin ndajintjin ta xuta ne, hitsë sa tijima chaya rë me cju ndajyihî tsëhë Jesucristu. ¹³Hisca yëjë sindadu xi jiyahñu rë ngahan cojo yëjë ni xuta xi yahnga ne, vëë me xi tsëhë xi jemu xuta rë Jesucristu ngahan ne, vëhë xi caveya ná me ndavaya. ¹⁴Hacuaha jemu cjín xingueen ne, tsëhë xi camachaya rë me hacutjin vátju quihndë xi tejñaya ndavaya ne, hitsë sa mangucacun me cojo Nina. Hane vëhë xi macjiin cacun me xi chja me cju rë Nina.

¹⁵Quixi ta hacuaha tjin xuta xi sua me machaya rë xuta cju tsëhë Jesucristu. Peru tsëhë xi sahmi xín cacun me cojo ná, hacuaha mijí rë me xi cju naha cjuexcun, vëhë xi cojo me chja me. Peru yahnga nga me ne, cuatjin chja me ta, tsëhë xi jemu tjin rë me cjuandaja. ¹⁶Cuma cuinújan ne, me xi cuacun tjin rë cjuandaja jan ne, sua me machaya rë xuta cju tsëhë Jesucristu ngatsë rë cjuahmutacun xi tjin rë me cojo ná, tsëhë xi ha vëë me ta Nina ne, casua ná me xa xi cuichjátë ngatsë rë cju ndajyihî tsëhë Jesucristu. ¹⁷Peru me xi cuacun tjin rë cjuaxintacun jan ne, sua me machaya rë xuta cju vëhë ngatsë rë xi meje sahmi yehë suvá me yojo rë me. Tsajin rë me ngu cjuatacun xi ndajyihî xi cuatjin chja me. Xi má rë me ne, ngahan ne, xi tejñaya ndavaya nguehe ne, cumacjíncacun ngatsë rë xcusun xi tisahmi

me. ¹⁸Tsimii sahmi rë xi cuatjin cjuatacun rë me xi chja me cju rë Nina, ¿há xi nguñajacacun me ne?, o ¿há xi hacuiin nguñajacacun me ne?, ndastu cuenda xi cju tsëhë Jesucristu ne, tijimachaya rë xuta. Vëhë xi jemu ndama ná.

¹⁹Hya xi ha cuatju cjuacjintacun naha ne, hacuaha ndaja cuma ná ta tsëhë xi ha hvë ta hya cuma tsejen xi tsajin jyé naha. Cuatjin cuma ta tsëhë xi tichjahyun rë Nina ngatsë naha, hacuaha tsëhë xi Hasen xi casua naja Jesucristu ne, cuisecoo ná. ²⁰Jemu meje ná xi ngajñi rë yëjë ni xcusun xi sahme ne, tsajin mé xi sua sava ná. Hacuaha meje ná xi cumacjiin cacún ngajñi rë tu mé ni cjuacjintacun, cojo sa xi xuta ne, hatuxa sahmi jyë hnga me Jesucristu ngatsë naha, sa xi tsismi ná xutaxa rë ne, o sa tsajin ne, sa xi tsiquehen ná me. ²¹Peru jinguyëjë rë xi tejña cjuahñu ne, hatuxa meje sahme nguñajacacun yëjë ni hacutjin xi Jesucristu meje rë me. Hacuaha sa xi cueya ne, jemu ndaja tsahan. ²²O sa xi cuitejña sa cjuahñu ne, xa xi sahme ngatsë rë Jesucristu ne, ndatjin cuetju. Vëhë xi hisca hveen ne, jarë xi hitsë sa chuya ná, ¿há xi cueya ne?, ¿há xi cuitejña cjuahñu? ²³Cuma cuinújan ne, jemu chja sacuse ná jarë xcusun xi ndatjin. Jercu meje cjué tjëngë Jesucristu ngajan hiscan tacun me ta, jemu sa ndaja tsahan xi cuatjin. ²⁴Peru hitsë sa mameje rë xi cuitejña cjuahñu ngatsë nuju. ²⁵Tsëhë xi cajnecacún tsëhë cjuatacun vëhë ne, vëhë xi hvë ta cuitejña sa cjuahñu. Cuitejña sa cojo nuju ngayujun ni ne, cojo sa xi cuisécoo nuju xi tuxaha sa cjuatacun

nuju xi chutayun cjuachacun xi macjain naja, hacuaha hitsë sa ndaja cuma rë xahasen nuju tsëhë cjuavëhë. ²⁶Hacuaha hya xi cuinduvá cuitejña nga cojo nuju ne, cuinújun ta jemu ndaja Jesucristu, ngatsë rë xi cavétju ndavaya.

²⁷Nihñu yëjë ni hacutjin xi meje rë xi sahmi xuta xi ha macjain jain rë me cjuavëhë ndajyihí tsëhë Jesucristu. Cuatjin nihñu, cojo sa xi ndaja cjuasacu ná tsujun, ¿há xi cuinduvá tjëngë nuju?, o sa tsajin ne, ¿há xi tejñataha jingu sa ladu? Peru meje cumachaya ná xi ngayun ne, tjin tangun cjuatacun nuju, hacuaha visecuun xingun xi nújun tjun ngatsë rë cjuavëhë ndajyihí xi macjain naja. ²⁸Hacuaha meje cumachaya ná xi ngayun ne, rcuun camahani tsëhë xuta xi sahmi nuju me condra. Xi cuatjin rcuun ne, cuma tsejen xi Nina ne, tacun jain me cojo nuju. Hacuaha cuma tsejen xi cuechu nixtin xi Nina ne, tsingatju me xuta xi cuacun jan xcun ndihi, peru ngayun ne, cuaxëtje nuju me. ²⁹Nina ne, ndaja casahmi me cojo nuju xi hacuini suvá xi cumacjain ni nuju Jesucristu ta hacuaha cuatjun cjuavëhë ngatsë rë xi macjain nuju me. ³⁰Titjun ne, cahyun cjuavëhë xi cavátju camá. Quihndë ne, camachaya nga nuju xi ha cuanitjin ni tivátju tijima. Hacuaha ngayun ne, hacuanitjin ni tivatjun tijima quihndë.

Meje rë xi chjayanguen tsëhë Cristu sacuahacatsinguijne me yojo rë me

2 Tjin rë xahasen nuju cjuasua ta, tsëhë xi tjin tangun cjuatacun nuju cojo Jesucristu. Tjin

nuju cjuatacun ta, tsëhë xi me vëhë ne, hmucacun nuju me. Tjin tangun cjuatacun nuju cojo Hasen rë Nina. Hacuaha tjin nuju cjuahmutacun cjuayumatacun cojo xingun, xingu xingu ngayun. ²Quihndë ne, cojo sa xi cuma chihin cjuasua xi tjin rë xahasen naha ne, cuitjin nihñu. Nihñu tangun cjuatacun nuju cojo xingun. Hacuaha ngajñi nuju ne, nihmutacun xingun cojo ngu ni cjuatacun nuju. ³Sa xi meje nuju xi suvun ni xi ndajyihí cuatjun cuma ne, ndajin tjin. Hacuaha mijí rë xi nihñu yehe yojo nuju ta, xi meje rë ne, jeya ngayun. Hacuaha meje rë xi chutsujun xingun sacuahacatsinguijne me hitsë sa vengui chjí rë me xi cumá nuju ngayun. ⁴Mijí rë xi tsujun suvun ni cuinchunsun xi ndaja ta, hacuaha meje rë xi tinchunsun xi ndaja xi cumá rë jingu sa xuta.

⁵Meje rë xi ningatuhuntacun sacuahacatsingatahacacun Jesucristu. ⁶Me vëhë ne, handasa ha Nina me ne, peru hacuini casahmi jyë hnga me yojo rë me xi meje cuejña me sacuahacatsinguijne me Nina ta, ⁷cahndë rë vëhë ne, cavejñaxin me cahndë rë me xcun Nina, hane casahmicuenda me xuta camá me ngu xuta sacuahacatsinguijne me cojo sa xi sahmi me yëjë ni hacutjin cuitexa Nina me. Hya xi ha camá me xuta ne, ⁸cahndë me yëjë ni hacutjin cachja Nina, hacuaha catsingatihin me xi catsisava xuta me, hisca catsingatihin me xi catsiquehen xuta me xcun cru, sacuahacatsinguijne me jemu jyë jyë rë me. ⁹Vëhë xi Nina ne, hya xi catsicuya me Jesucristu cjuahñu ne, hya casahmi jyë hnga me Jesucristu, hacuaha ngu ni me

vêhê xi jemu vengui chjî rê ñihi rê me. ¹⁰Cuatjin casahmi Nina, cojo sa xi yêjê ni ângel, yêjê ni xuta, cojo yêjê ni xitsehen ne, cuechú nixtin xi cuixcuhnchi xcun Jesucristu xi cjuaharcun rê me. ¹¹Hacuaha cuichja ta Jesucristu ne, hatuxa matitjun jain me. Xi cuatjin ne, cumatsejen xi Nina Nahmi naja ne, hatuxa jemu jyê hnga me cojo cjuatacun rê me.

Xuta xi macjain rê me Nina ne, tsejen xcusun rê me xcun yahnga xuta

¹²Sacuatjin ndaja canuhyun tsahan hya xi cavinechan cojo nuju, tsan ne, cuatjin hitsê sa nguñajatacun tinuhyun tsahan quihndê xi xín tejñataha. Hacuaha meje rê xi nihñu yêjê ni hacutjin xi chuya rê Nina ta, tsêhê xi me vêhê xi vaxêtje nuju me. Ndaja cuidadu cojo sa xi cumachihin cjuatacun vêhê. ¹³Hacuaha scaa nuju nihñu cuatjin ta, tsêhê xi Nina sahmi me xi meje nihñu yêjê ni hacutjin xi chuya rê me, hacuaha sua nuju me ngahñu xi scaa nuju nihñu cuatjin.

¹⁴Ngajñi rê yêjê ni cjuacjintacun xi tjin nuju ne, xi canújunjyuun cojo xingun xi chuyiin nuju, xi canujuun cuitjin cuatjin. ¹⁵Xi cuatjin ne, tsajin jyê nuju hacuaha tyjahi xahasen nuju. Cuma cuinújan ne, ngayun xi ha quihndi rê Nina ngayun ne, tsajin jyê nuju, xi nechun ngajñi rê xuta tsehen xuta ndajin xi siu ngasunhndê. Meje rê xi cumatsejen xi jemu ndaja ngayun ngajñi rê xuta tsehen, ¹⁶xi tuhun machaya rê xuta cjuahñu xatsê. Cuatjin nihñu ne, cojo sa xi ndaja cuma

ná ngatsê nuju nixtin xi cuya nga Jesucristu ta, tsêhê xi xi cuatjin ne, hya cumatsejen xi hacuiin tu mahya casahme ngahñu xi sahme hacutjin xi chuya rê Jesucristu, hacuaha hacuiin tu mahya casahme xá. ¹⁷Ha ndasa tsiquehen ná xutaxa rê tsêhê xi ngahan cavisécoo nuju xi cumacjain nuju Jesucristu hacuaha cavisécoo nuju xi nihñu xa rê me, peru ndaja cuma ná. Hacuaha ndama ná xi ngayujun ni ne, casua nuju Nina cjuandaja rê me. ¹⁸Ha chuva vêhê ni ne, ndaja catama nuju ngatsê rê cjuandaja vê, hacuaha ndaja catama nuju ngatsê naha.

Ejemplu xi sua apóstol

¹⁹Sa xi meje rê Jesucristu, me xi matitjun tsajan, sacuatjin xi meje ná ne, tsingátju nuju Timoteo. Meje tsingátju nuju me cojo xati, cojo sa xi ngahan ne, hacuaha ndaja cuma rê xahasen naha, hya xi cuya nga me cojo cjuahacutjin tivatjun tijima. ²⁰Me vêhê tsingátju me ta, tsêhê xi tsajin sa ná ngu xuta xi vinga nuju sacuaha me vêhê. Me vêhê ne, jemu meje rê me xi ndaja cuatjun cuma. ²¹Peru yêjê me xi yahnga ne, sahmi cuenda me cjuandya rê suvá ni me, sahmi cuendaain me xa xi meje rê Jesucristu xi cumá. ²²Peru ha hyun xcusun rê Timoteo. Ha hyun ta hya xi cavisécoo ná me xi catihin cumachaya rê xuta cjuahacutjin rê Nina ne, cavisécoo ná me sacuaha visécoo ngu quihndi nahmi rê. ²³Vêhê xi, xi tu sacú cumachaya ná mé xi cuátju cuma ne, me vêhê xi meje tsingátju nuju me. ²⁴Hacuaha xi má ná ne, me xi matitjun tsajan ne, sua me cahndê xi cojo xati ne, cuinduvá tjêngê nuju.

²⁵Peru xi má ná ne, hacuaha sahmi ngujyë xi tsingátju nuju Epafrodito xingueen. Me vëhë ne, casahmi me coná xa, hane cojo me vëhë cacaa niji cojo cjuahngatacun rë xuta xi chohovëë naja. Hacuaha cavisecoo ná me sacuatjin xi meje nuju ngayun xi caningatjun me. ²⁶Hane me vëhë ne, jemu tjin cacun me xi meje scuëë nuju me ngayujun ni ta, tsëhë xi choho camá rë me xi camachaya nuju cjuaxi hmu rë me. ²⁷Hacuaha quixi xi jemu cama hmu rë Epafrodito. Ña meje cueya me. Peru cahmii me ta, tsëhë xi camayuma rë Nina me. Hacuaha camayuma rë Nina ngahan ta, tsëhë xi mijí rë me xi cuma jyë sa cjuachoho xi tivátju tijima. ²⁸Vëhë xi cojo xati ne, tsingátju nuju Epafrodito, sehe cuma sua rë xahasen nuju xi chun nga me ngu ndiya. Hacuaha ngahan ne, cuma chuva hitsë cjuachoho xi tivátju tijima. ²⁹Vëhë xi chjuhunntsun me cojo cjuasua, tsëhë xi me vëhë ne, hacuaha macjain rë me me xi matitjun tsajan. Hacuaha chjuhuncun yëjë ni xuta xi tangun cjuatacun rë cojo rë me. ³⁰Me vëhë ne, tsëhë xi jercu casahmi me xa tsëhë cjuaxi rë Jesucristu ne, vëhë xi hitsë sa ne, cahme me. Handasa cavetaha tsavi me yojo rë me xi cavisecoo ná me ne, peru camacjiincacun me xi cavisecoo ná me cahndë nuju ngayun.

**Xcusun xi jemu vengui
chjí camahani rë**

3 Quihndë tsan ne, catamasua rë xahasen nuju ngatsë rë me xi matitjun tsajan.

Ngahan ne, hacuiin ndya ma ná xi cúya tsihindu nga nuju cjuaxi ha cachjá cojo nuju ta, tsëhë xi cjuaxi

vëhë ne, cuisecoo nuju xi tsajin yo tsinguetsun cjuatacun nuju xi macjain nuju Jesucristu. ²Nechun cuidadu cojo xuta machjiriin xi vindacha xi chja xi hachu meje rë xi xtí yojo naja, sehe tsejen xi tsëhë Nina ngayaan. ³Quixiin cjuaxi rë me ta ngayaan xi tsejen xi tsëhë Nina ngayaan. Hane Hasen rë Nina ne, visecoo naja xi ma chjahanrcun Nina, hacuaha nechancjuasua ngatsë rë Jesucristu. Ha hyan ta hatuxa cumaji cuetjuntjen ngatsë rë xcusun xi cun ngayaan cojo xcusun xi nihña. ⁴Peru sa xi cuatjin cuma cuetjuntjen suvaan ne, ngahan ne, hitsë sa tjin ná chuva rë xi cuétjutjé xi cumá rë xuta xi yahnga. ⁵Ngahan ne, hacuaha cati ná xi cavéchu xi jyin nixtin, sacuaaha xcusun rë xutachanga naha. Ngahan ne, tjë rë xuta nangui Israel ngahan. Hacuaha quihndindai cjin rë Benjamín ngahan. Ha tuxa xuta tjë rë Israel ngahan ta xutacha naha ne, hacuaha xuta tjë rë Israel me. Ngahan ne, tsëhë partidu fariseo ngahan hacuaha casahme yëjë ni hacutjin chja ley rë yungun naha. ⁶Ngahan ne, jercu cavétaharcu xcusun rë xutachanga naha, hane vëhë xi hisca casuá cjuañihi xi cuma rë xuta xi macjain rë Jesucristu. Ngahan ne, tsëhë xi casahme sacuatjin chja ley rë yungun naha ne, vëhë xi camaji catsicaniji ná xuta hisca ngu jyé. ⁷Xi catsingátahacacun hatsëë ne, jemu vengui chjí rë yëjë xcusun vëhë. Peru ngatsë rë Jesucristu ne, xi má ná quihndë ne, venguiin camahani chjí rë xcusun vëhë ta, cumaji cuaxëtje ná. ⁸Hisca

venguiin chjí rë yëjë sa xcusun, má ná ta, tsëhë xi jercu vengui chjí rë xi tjin tangun cjuatacun naha cojo Jesucristu, me xi matitjun tsajan. Ngatsë rë me vëhë ne, ngahan ne, cacandëxen yëjë ni xcusun, sacuaha xi chanden xtë, cojo sa xi ngahan ne, cuma tsëhë Jesucristu ngahan. ⁹Hacuaha cuma tangun cjuatacun naha cojo rë me. Xi cuatjin ne, cjuë jyë naha, hacuiin ngatsë rë xi sahme hacutjin chja ley rë yungun ta ngatsë rë xi macjain ná Jesucristu. Nina ne, tsicjë me jyë naja ngatsë rë xi macjain naja Jesucristu. ¹⁰Jemu meje ná xi ndaja cuma tangun cjuatacun naha cojo Jesucristu. Hacuaha meje ná xi cojo ngahan sacu ná ngahñu xi catsingacun Nina, hya xi camá catsicuya me Jesucristu cjuahñu. Sa xi meje rë Nina ne, ngahan ne, tsingatehen xi cuátju cjuañihi hacuaha hisca tsingatehen xi tsiquehen ná xuta ta, tsëhë xi cuatjin cavatju Jesucristu camá. ¹¹Hane hya xi cueya ne, meje rë Nina xi hacuaha tsicuya ná me cjuahñu xi tejña ngajñi rë nima. ¹²Cjëë cuma chihin yëjë ni cjuatacun xi meje ná vë, hacuaha chaja sa cuma tyjahi cjuatacun naha. Peru tisahme sa ngahñu, cojo sa xi cuma sahme chehen cjuatacun vëhë. Cuatjin sahme ta, tsëhë xi Jesucristu ne, ha casahmi tsëhë me ngahan. ¹³Cúya cuichjá cojo nuju tsan ta, cjëë sahme chehen cjuatacun vëhë. Peru cuitjin meje sahme: tsicháya xcusun xi ha cavátju camá, hacuaha sahme ngahñu xi cuma sahme xcusun xi vengui chjí rë xi sehe nduva.

¹⁴Tisahme ngahñu xi cuma sahme chehen xcusun vëhë, cojo sa xi sacú ná cuatjo xi sua ná Nina ngatsë rë xi macjain ná Jesucristu. Nina ne, cuaxijin ná me xi cuitejña ngajan ngahnga hiscan tacun me.

**Meje rë xi tjin tangun yaan
xi macjain naja Nina**

¹⁵Vëhë xi ngayaan xi ha ndaja macjain naja Jesucristu ne, meje rë xi cuatjin cuiyujun cjuatacun naja. Hane sa xi tjin yahnga ngayun xi hacuiin cuatjin cuiyujun cjuatacun nuju ne, Nina tsingacun nuju me hacutjin xi cjuaquixi. ¹⁶Ndastu sahmi nguyjë xi nihña cuenda tsëhë cjuaquixi xi ha hyan ne, cuatjin meje rë xi nihña.

¹⁷Vëhë xi meje rë xi nihñu hacutjin xi sahme, tsan. Hacuaha tetuhuncun xcusun rë xuta xi sahmi hacutjin xi sahme. ¹⁸Ha jemu cachjá cojo nuju ta jemu cjín xuta xi condra me tsëhë cjua ndajyihí xi sua machaya naja hacutjin cahme Jesucristu xcun cru. Ña tijíhnda xi tichjá nga ngu ndiya cojo nuju cjua vëhë. ¹⁹Peru xuta xi sahmi me condra cjua ndajyihí vë ne, cjue me xcun ndihi. Cahndé rë xi cjuaharcun me Nina xi cjuaquixi ne, hitsë sa faharcun me tu mé ni xcusun xi chuya rë me. Cahndé rë xi cuma sava rë me tsëhë xcusun xi sahmi me ne, tu hitsë sa sahmi yehe me yojo rë me. Cuma cuinújan ne, tjin tangun cjuatacun rë me cojo cjuatacun rë ngasunhdë. ²⁰Peru ngayaan ne, xuta tsëhë ngahnga ngayaan. Hacuaha ha nechayan rë Jesucristu, me xi matitjun tsajan, ta cuinduva

me tsèhè ngajan xi cuaxètje naja me. ²¹Me vèhè tsindeya me yojo jyé naja xi tsajin mé machji rèhè, hane sahmi me sacuaha yojo rè suvá me xi jercu vengui chjí rè. Cojo ngahñu rè suvá me ne, sahmi me ta, tsèhè xi me vèhè matitjun me tsèhè yèjè ni xcusun.

**Tahan cjuasua yèjè ni nixtin
ngatsè rè Nai naja**

4 Vèhè xi sacuatjin xi ha macjain nuju me xi matitjun tsajan tsan ne, cuatjin tangun cojo ngasunhdè nuju. Jercu meje cuinduvá tjèngè nuju tsan. Jemu ma sua rè xahasen naha ta, tsèhè xi ngayun ne, tivangun nduju cojo cjuatacun nuju xi macjain nuju Jesucristu.

²Quihndè ne, féhya nuju ngayun Evodia cojo ngayun Síntique nihñu favor ne, ngu tangun ni catama cjuatacun nuju cojo xingun, sacuatjin meje rè xi nihña ngayejen ni xi tsèhè me xi matitjun tsajan ngayaan. ³Hacuaha ngaye xi ndaja compañeru naha ngaye ne, nihñi favor ne, tisecuee rè na xi cuacun vè, xi cuijnetaha si xi tisahmi na cojo xicjin na. Ta na xi cuacun vè ne, jercu casahmi na cojo ná xa, hya xi catihin camachaya rè xuta cju ndajyihí tsèhè Jesucristu. Hacuaha cojo cha Clemente cojo sa yahnga compañeru naha ne, cavisecoo ná me. Xuta xi cuacun vè ne, hatuxa sacú rè me cjuahñu xatsè ta, tsèhè xi ha tsèhè Nina me.

⁴Ndaja catama rè xahasen nuju ngatsè rè xi tjin tangun cjuatacun nuju cojo me xi matitjun tsajan. Cúya cuichjá nga cojo nuju, ndaja

catama rè xahasen nuju. ⁵Meje rè xi cuma tsejen xi tjin nuju cjuandaja cojo yèjè ni xuta ta, tsèhè xi me xi matitjun tsajan ne, ha tacun xati xi cuinduva nga me. ⁶Ngajñi rè yèjè ni cjuacjintacun nuju ne, xi camacjiintacun. Tinújun cojo Nina hacuaha chjahyun rè me cjuandaja rè me. Hacuaha tuhun nacuechji rè me. Cuatjin meje rè xi tuhun cumachaya rè Nina tu mé ni xi meje nuju. ⁷Ngajan xi cjuajeya xi sua nuju Nina ne, vèhè cuetjo nuju, cojo sa xi cumacjiintacun, xi tjin tangun cjuatacun nuju cojo Jesucristu. Sacuaha cjuajeya xi sua nuju Nina jan ne, hisca vijniircun ndandaja ta, tsèhè xi jemu tu ndaja camahani cjuajeya vèhè.

**Xcusun ndaja xi meje rè xi
cuinchan cjuatacun naja**

⁸Quihndè tsan ne, nihñu tangun cjuatacun nuju cojo cjuatacun xi cuicun vihi: cjuatacun xi cjuaquixi, cjuatacun xi chjaharcun rè, cjuatacun xi ndatjin, cjuatacun xi tyjahi, cjuatacun xi ndacun, cjuatacun xi chuya rè xuta ndaja. Cuma cuinújan ne, tu jarè ni cjuatacun xi jemu ndaja o sa xi hatuxa tjin chuva rè xi chjaharcun rè ne, vèhè nihñu tangun cjuatacun nuju cojo. ⁹Hacuaha nihñu yèjè ni hacutjin xi camá nuju hya xi cavicuyá nuju hacutjin meje rè xi nihñu. Peru hacuiin suvá cju xi cachjá cojo nuju ta hacuaha cojo xcusun xi casahme ngajñi nuju ne, cojo vèhè meje rè xi nihñu. Hane cuatjin ne, Nina xi sua naja cjuajeya ne, tacun me cojo nuju.

**Cjuatjo tsëhë xuta nandya
Filipo xi cuma rë Pablo**

¹⁰Ngatsë rë me xi matitjun tsajan ne, jercu ndama ná ta, handasa jemu cavatju nixtin ne, hindë cavuyun caningatuhuntacun nga ngatsë naha. Hacuini hatuxa canichayun ná ta, cuenda xi casacuinyiin nuju hacutjin cuma xi cuiseacun ná hisca quihndë. ¹¹Hacuini tichjá cojo nuju cuatjin ngatsë rë xi tjin mé xi ma chaja ná ta, ngahan ne, ha casacu ná chuva rë hacutjin cumangucacún cojo tu mé ni cjuacjintacun xi nduva. ¹²Sa yuma sa nchina ngahan ne, hatuxa mangucacún. ¿Há tjin xi sínë?, o ¿há tsajin xi sínë?; ¿há xi jercu tjin ná?, o ¿xi ma chaja ná?, tsmii sahmi rë ta ngahan ne, ha catuxaha cjuatacun naha xi cumangucacún cojo tu mé ni cjuacjintacun xi nduva. ¹³Scaa ná cojo tu mé ni cjuacjintacun ta, tsëhë xi Jesucristu ne, tisua ná me ngahñu. ¹⁴Peru, jemu ndaja canihñu xi caviseacun ná ngajñi rë cjuañihi xi tivátju tijima. ¹⁵Ngayun xuta nandya Filipo ne, ha hyun ta haya xi tjutjun casuá camachaya nuju cju ndajyihí tsëhë Jesucristu hacuaha sehe cavétju tsëhë distritu Macedonia ne, hisca ngu yungun cavisecaaain ná cojo tujún haya. Suvun tutu xi caviseacun ná. ¹⁶Hacuaha haya xi tejñataha ngajan nandya Tesalónica ne, ngu

jo ndiya ne, caningatjun tujún tsëhë cjuachaja xi tjin ná. ¹⁷Hacuini jercu meje ná cjuandaja xi ningatjun ná ta xi hitsë sa meje ná ne, xi sacu nuju cjuandaja rë Nina ngatsë rë cjuandaja xi nihñu. ¹⁸Ha cafahántsa yëjë ni xi caningatjun ná cojo Epafrodito. Vëhë xi ha tjin ná yëjë ni xi mameje ná. Hisca vangui sa xi tjin ná. Cuatjo nuju vë ne, tangun cojo ngu cuatjo xi ndaja jne, xi vejña xcun ngasuncun. Hane Nina ne, fahatsja me cuatjo jan ta jemu chuya rë me tsëhë. ¹⁹Hacuaha Nina naja ne, tsëhë cjuanchina ndajyihí xi tjin rë me ne, hatuxa sua nuju me tu mé ni xi machaja nuju, ngayujun ni xi tjin tangun cjuatacun nuju cojo Jesucristu. ²⁰Quihndë ne, catichja xuta ta Nina Nahmi naja ne, jercu ndaja camahani me yëjë ni nu yëjë ni nixtin. Cuatjin jain.

Cjua xi vijnetaha

²¹Yëjë ni xuta xi tjin tangun cjuatacun rë cojo Jesucristu ndyá ne, tuhun rë me nina naha. Hacuaha xingueen xi siu cojo ná nguehe ne, tsingatju me ngu nina nuju. ²²Hacuaha cojo sa yëjë me xi tsëhë Nina, hisca cojo me xi siu ngajan ndava me xi matitjun camahani tsëhë xuta Roma ne, tsingatju me nina nuju. ²³Cjuandaja rë Jesucristu, me xi matitjun tsajan ne, catejña cojo nuju.